

MISSALETTE



10 Mayo 2026 • IKA-6 NA LINGGO NG PASKO NG MULING PAGKABUHAY • Taon A



DADALANGIN AKO SA AMA, AT KAYO'Y BIBIGYAN NIYA NG ISA PANG PATNUBAY NA MAGIGING KASAMA NINYO MAGPAKAILANMAN

Ika-6 na Linggo ng Pasko ng Muling Pagkabuhay ngayon. Sa Mabuting Balita, tinuruan ni Hesus ang mga apostol na sundin ang Kanyang mga utos bilang tanda ng kanilang pagmamahal sa Kanya. Ipinangako Niya ang Espiritu Santo na sumasaatin sa Banal na Misa. Sa pagtanggap natin ng Banal na Katawan ni Hesus, tayo ay kaisa Niya sa pamamagitan ng Espiritu Santo. Manalangin tayo nang taos-puso sa pagdiriwang ng misteryong ito ng ating pananampalatayang ating sinisimulan.

PASIMULA

PAMBUNGAD

(Ipahahayag lamang kung walang awiting nakahanda.)

Buong galak na ilahad
upang marinig ng lahat
ang ginawang pagliligtas
ng Panginoong malakas.

Aleluya ang ihayag! *(Is 48, 20)*

PAGBATI

P –Pagpalain si Hesukristo, ang matuwid na taong namatay para sa atin. Ang kanyang biyaya at kapayapaan ay sumainyong lahat!

B –**At sumaiyo rin.**

PAGSISISI

P –Ipinaaalaala sa atin ngayon ni Hesus na ang ating pag-ibig sa kanya ay marapat na patunayan sa ating pamumuhay. Saglit nating alalahanin kung lahat ng ating gawa'y patunay nga ng ating pag-ibig sa Panginoon. (Manahimik saglit.)

P –Sa mga pagkakataong ang aming pag-ibig sa iyo'y sa salita at mga panlabas na palatandaan lamang, Panginoon, kaawaan mo kami.

B –**Panginoon, kaawaan mo kami.**

P –Sa mga pagkakataong nagkulang kaming gumalang at makitungong maayos sa aming kapwa, lalo na sa mga di mabuti sa amin, Kristo, kaawaan mo kami.

B –**Kristo, kaawaan mo kami.**

P –Sa mga pagkakataong namuhay kaming walang pagpapahalaga sa iyong paanyayang makiisa sa iyo at sa Ama, Panginoon, kaawaan mo kami.

B –**Panginoon, kaawaan mo kami.**

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –**Amen.**

PAPURI

B –**Papuri sa Diyos sa kaitaasan at sa lupa'y kapayapaan sa mga taong kinalulugdan niya.**

**Pinupuri ka namin,
dinarangal ka namin,**

sinasamba ka namin,
 ipinagbubunyi ka namin,
 pinasasalamat ka namin
 dahil sa dakila mong angking kapurihan.
 Panginoong Diyos, Hari ng langit,
 Diyos Amang makapangyarihan sa lahat.
 Panginoong Hesukristo, Bugtong na Anak,
 Panginoong Diyos, Kordero ng Diyos, Anak ng
 Ama.

Ikaw na nag-aalis ng mga kasalanan ng
 sanlibutan, maawa ka sa amin.
 Ikaw na nag-aalis ng mga kasalanan ng
 sanlibutan, tanggapin mo ang aming kahilingan.
 Ikaw na naluluklok sa kanan ng Ama,
 maawa ka sa amin.
 Sapagkat ikaw lamang ang banal,
 ikaw lamang ang Panginoon,
 ikaw lamang, O Hesukristo, ang Kataas-taasan,
 kasama ng Espiritu Santo
 sa kadakilaan ng Diyos Ama. Amen.

PANALANGING PAMBUNGAD

P – Ama naming makapangyarihan,
 gawin mong sa masasayang araw na ito
 ng aming pagdiriwang sa pagkabuhay ni Kristo
 kami’y makaganap ng pagdiriwang na wagas
 upang ang aming ginugunita
 ay lagi naming matupad sa gawa
 sa pamamagitan ni Hesukristo
 kasama ng Espiritu Santo magpasawalang
 hanggan.

B – Amen.

PAGPAPAHAYAG NG SALITA NG DIYOS

Unang Pagbasa

Gw 8, 5-8.14-17

Pagbasa mula sa mga Gawa ng mga Apostol

Noong mga araw na iyon: Nagpunta
 si Felipe sa isang lunsod ng Samaria at
 ipinangaral doon ang Mesiyas.
 Nang mabalitaan ng mga tao at makita
 ang mga kababalaghang ginagawa niya,
 pinakinggan nilang mabuti ang sinasabi niya.
 Sapagkat ang masasamang espiritu ay umaalis
 sa mga taong inaalihan nito at sumisigaw
 habang lumalabas; maraming lumpo at mga
 pilay ang napagaling. Kaya’t nagkaroon ng
 malaking kagalakan sa lunsod na iyon.

Nang mabalitaan ng mga apostol na nasa
 Jerusalem na tinanggap ng mga Samaritano
 ang Salita ng Diyos, sinugo nila roon sina
 Pedro at Juan. Pagdating doon, ipinanalangin
 nila ang mga Samaritano upang sila’y
 tumanggap din ng Espiritu Santo, sapagkat

hindi pa ito bumababa sa kaninuman sa
 kanila. Sila’y nabinyagan lamang sa pangalan
 ng Panginoong Hesus. At ipinatong nina Pedro
 at Juan ang kanilang kamay sa kanila at
 tumanggap sila ng Espiritu Santo.

Ito ang Salita ng Diyos.

B – Salamat sa Diyos.

Salmong Tugunan Sal 65, 1-3a. 4-5. 6-7a. 16 at 20

B – Sangkalupaang nilalang,
 galak sa Poo’y isigaw.

R. M. Velez



* Sumigaw sa galak ang mga nilalang!
 At purihin ang Diyos na may kagalakan;
 wagas na pagpuri sa kanya’y ibigay!
 Ito ang sabihin sa Diyos na Dakila:
 “Ang mga gawa mo ay kahanga-hanga.” **B.**

* Ang lahat sa lupa ika’y sinasamba,
 awit ng papuri yaong kinakanta;
 ang iyong pangala’y pinupuri nila.
 Ang ginawa ng Diyos, lapit at pagmasdan,
 ang kahanga-hangang ginawa sa tanan. **B.**

* Naging tuyong lupa kahit yaong tubig,
 at ang nuno natin ay doon tumawid;
 kaya naman tayo’y nagalak nang labis.
 Siya’y naghaharing may lakas ang bisig. **B.**

* Lapit at makinig, ang nagpaparangal
 sa Diyos, at sa inyo’y aking isasaysay
 ang kanyang ginawang mga kabutihan.
 Purihin ang Diyos! Siya’y papurihan,
 yamang ang daing ko’y kanyang
 pinakinggan,
 at ang pag-ibig n’ya ay aking kinamtan. **B.**

Ikalawang Pagbasa

1Ped 3, 15-18

Pagbasa mula sa Unang Sulat ni Apostol San
 Pedro

Mga pinakamamahala:

Idambana ninyo sa inyong puso si
 Kristong Panginoon. Humanda kayong lagi
 na magpaliwanag sa sinumang magtatanong
 sa inyo tungkol sa inyong pag-asa. Ngunit
 maging mahinahon at mapitagan kayo sa
 inyong pagpapaliwanag. Panatilihin ninyong

malinis ang inyong budhi upang mapahiya ang mga umaalipusta at tumutuya sa inyong magandang asal bilang mga lingkod ni Kristo. Higit na mainam ang kayo’y magdusa dahil sa paggawa ng mabuti, sakali mang loobin ito ng Diyos, kaysa magdusa kayo dahil sa paggawa ng masama. Sapagkat si Kristo’y namatay para sa inyo. Namatay siya dahil sa kasalanan ng lahat—ang walang kasalanan para sa mga makasalanan—upang iharap kayo sa Diyos. Siya’y namatay ayon sa laman, at muling binuhay ayon sa Espiritu.

Ito ang Salita ng Diyos.

B – Salamat sa Diyos.

ALELUYA

Jn 14, 23

B – Aleluya! Aleluya!
Ang sa aki’y nagmamahal,
tutupad sa aking aral.
Ama’t ako’y mananahan.
Aleluya! Aleluya!

Mabuting Balita

Jn 14, 15-21

P– Sumainyo ang Panginoon.

B– At sumaiyo rin.

P– Ang Mabuting Balita ng Panginoon ayon kay San Juan

B– Papuri sa iyo, Panginoon.

Noong panahong iyon, sinabi ni Hesus sa kanyang mga alagad: “Kung iniibig ninyo ako, tutuparin ninyo ang aking mga utos. Dadalangin ako sa Ama, at kayo’y bibigyan niya ng isa pang Patnubay na magiging kasama ninyo magpakailanman. Ito’y ang Espiritu ng katotohanan, na hindi matanggap ng sanlibutan sapagkat hindi siya nakikita ni nakikilala ng sanlibutan. Ngunit nakikilala ninyo siya, sapagkat siya’y sumasainyo at nananahan sa inyo.

Hindi ko kayo iiwang nangungulila; babalik ako sa inyo. Kaunting panahon na lamang at hindi na ako makikita ng sanlibutan. Ngunit ako’y makikita ninyo; sapagkat mabubuhay ako at mabubuhay rin kayo. Malalaman ninyo sa araw na yaon na ako’y sumasa-Ama, kayo’y sumasaakin, at ako’y sumasainyo.

Ang tumatanggap sa mga utos ko at tumutupad nito ang siyang umiibig sa akin. Ang umiibig sa akin ay iibigin ng aking Ama; iibigin ko rin siya, at ako’y lubusang magpakilala sa kanya.”

Ito ang Mabuting Balita ng Panginoon.

B– Pinupuri ka namin, Panginoong Hesukristo.

HOMILIYA

SUMASAMPALATAYA

B – Sumasampalataya ako sa Diyos Amang makapangyarihan sa lahat, na may gawa ng langit at lupa. Sumasampalataya ako kay Hesukristo, iisang Anak ng Diyos, Panginoon nating lahat. Nagkatawang-tao siya lalang ng Espiritu Santo,

ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit.

Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao. Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen.

PANALANGIN NG BAYAN

P – Ipinangako ni Hesus sa atin ang Banal na Espiritu. Manalangin tayong mapasa atin ang mga kaloob Niya upang tayo ay maganyak Niyang magmahal habang ipinagdarasal ang Simbahan, ang sandaigdigang at ang ating mga sarili. Manalangin tayo: Kristong Muling Nabuhay, Espiritu Santo ay suguin at dinggin ang aming panalangin.

B– Kristong Muling Nabuhay, Espiritu Santo ay suguin at dinggin ang aming panalangin.

* Para sa Simbahang Katoliko. Patatagin nawa Siya ng Diyos sa pananampalataya at pangalagaan ang Kanyang mga lider. Tanglawan nawa Siya ng Espiritu Santo upang maitaguyod Niya ang katotohanan at pagmamahal. Manalangin tayo. **B.**

* Para sa lahat ng overseas *Filipino workers*, lalo na yung mga nasa bansang nakikipagdigmaan. Kanlungin nawa sila ng Diyos at ingatan sa lahat ng kapahamakan. Manalangin tayo. **B.**

* Para sa mga ina ngayong *Mother’s Day*. Puspusin nawa ng Espiritu Santo ang kanilang puso ng pag-ibig at itaguyod at mahal sila ng kanilang mag-anak. Manalangin tayo. **B.**

* Para sa ating lahat. Batbat man ng alalahanin, tayo'y di nawawalan ng pag-asa. Binabagabag man ng suliraning pinansyal at ispiritwal tayo ay nananatiling panatag. Ito ay dahil sa Espiritu Santo. Manalangin tayo. **B.**

P –Hesus na Muling Nabuhay, sa tulong ng Espiritu Santo, biyayaan Mo kami ng grasyang makita Ka sa pang-araw-araw naming buhay. ‘Wag Mo kaming iwang ulila sapagkat kung wala Ka ay wala kaming magagawa. Ikaw na nabubuhay at naghahari magpakailanman.
B –**Amen.**

PAGDIRIWANG NG HULING HAPUNAN

P – Manalangin kayo . . .

B– **Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.**

PANALANGIN UKOL SA MGA ALAY

P – Ama naming Lumikha, paakyatin mo sa iyong piling sa kalangitan ang aming mga panalanging kalakip ng haing mga alay upang ang mga pinagindapat mong gawing dalisay ay maging marapat na makasalo sa piging ng iyong pagmamahal sa pamamagitan ni Hesukristo kasama ng Espiritu Santo magpasawalang hanggan.
B – **Amen.**

PREPASYO NG PAGKABUHAY II

P–Sumainyo ang Panginoon.

B– **At sumaiyo rin.**

P – Itaas sa Diyos ang inyong puso at diwa.

B– **Itinaas na namin sa Panginoon.**

P – Pasalamat natin ang Panginoong ating Diyos.

B –**Marapat na siya ay pasalamat.**

P –Ama naming makapangyarihan, tunay ngang marapat na ikaw ay aming pasalamat lalo ngayong ipinagdiriwang ang paghahain ng Mesiyas, ang maamong tupa na tumubos sa aming lahat.

Sa paghahain ng sariling buhay at sa pagkabuhay ng Anak mong mahal, nabuksang ganap ang iyong tahanan

at kaming pinaghaharian mo'y naging kasambahay.

Sa pagkamatay niya sa krus, nalupig ang kamatayan.

Sa kanyang pagkabuhay, naging buhay siya ng tanan.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B – **Santo, santo, santo**
Panginoong Diyos
ng mga hukbo!
Napupuno ang langit at lupa
ng kadakilaan mo!
Osana sa kaitaasan!
Pinagpala
ang naparirito
sa ngalan
ng Panginoon!
Osana sa kaitaasan!

PAGBUBUNYI

B – Aming ipinahahayag na namatay ang ‘yong Anak, nabuhay bilang Mesiyas at magbabalik sa wakas para mahayag sa lahat.

PAKIKINABANG

B – **Ama namin . . .**

P – Hinihiling namin . . .

B – **Sapagkat iyo ang kaharian at ang kapangyarihan at ang kapurihan magpakailanman. Amen.**

PAANYAYA SA KAPAYAPAAN

PAGHAHATI-HATI SA TINAPAY

B – **Kordero ng Diyos na nag-aalis ng mga kasalanan ng sanlibutan, maawa ka sa amin. (2x)**
Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

PAANYAYA SA PAKIKINABANG

P – Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B – **Panginoon, hindi ako karapat-dapat na magpatuloy sa Iyo ngunit sa isang salita Mo lamang ay gagaling na ako.**

ANTIPONA NG PAKIKINABANG

(Ipahayag lamang kung walang awiting nakahanda.)

Kung ako ay mamahalin,
mga utos ko'y tutupdin
at sa inyo'y susugin
Patnubay sa inyong piling.
Aleluya ay awitin! (Jn 14, 15-16)

PANALANGIN PAGKAPAKINABANG

P –Ama naming mapagmahal,
kaming pinapagsalo mo sa pagkabuhay ng iyong
Anak
ay papakinabangin mong lagi sa kanyang lakas
bilang bungang masagana ng dulot mong
pagliligtas
sa pamamagitan niya kasama ng Espiritu Santo
magpasawalang hanggan.
B –Amen.

PAGWAWAKAS


P –Sumainyo ang Panginoon.
B –At sumaiyo rin.
P –Pagpalain kayo ng makapangyarihang
Diyos: Ama, Anak, at Espiritu Santo.
B –Amen.
P –Humayo kayo sa kapayapaan upang
mahalin at paglingkuran ang Panginoon.
B –Salamat sa Diyos.




Like us on
Facebook

WORD AND LIFE PUBLICATIONS

Panahon ng Pasko ng Muling Pagkabuhay!



KRISTOKids



P150.00/kopya


• P100.00 /kopya kapag nag-subscribe sa 6 na isyu sa:
www.wordandlife.org

Kumpletong gabay ng katekista para tulungan ang mga bata na maintindihan at maisabuhay ang Mabuting Balita at ang kuwento ni Kuya Hesus. Maaring gamitin din ito ng mga pamilya sa kanilang pag-aaral, pagninilay, at pagdarasal ng Bibliya.

Katolago Foundation, Inc.
The Annex
165 Dangay St. Project 7, Veteran's Village,
Quezon City, Phils 1105 • Cel. No. +63 947 999 2 999
E-mail: katolago@gmail.com • www.katolago.com
www.facebook.com/katolago

WORD AND LIFE PUBLICATIONS
Don Bosco Compound, A. Arnaiz Ave. cor. Chino Roces Ave., Makati, Philippines
Tel. Nos. (632) 8894-5401 • 8845-1792 • 8818-8636 • Cell# (63) 917-629-5485
E-mail: wordandlifepublications@gmail.com
Website: www.wordandlife.org
Word And Life Publications / Word And Life Religious Store

Scan our QR CODES for our online shops at
Lazada **Shopee**



WORD AND LIFE PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila
Postal Address: P.O. Box 1820, MCPO, 1258 Makati, Metro Manila, Philippines
Tel. Nos. 8894-5401; 8475-8945 • **Website:** www.wordandlife.org
• **E-mail:** wordandlifepublications@gmail.com • **FB:** Word And Life Publications
• **Editorial Team:** Fr. R. De Guzman, J. Lacandazo, V. David, R. Molomog, D. Daguio
• **Illustrations:** A. Sarmiento, B. Cleofe • **Circulation:** R. Saldua